



Réckbléck op d'Scouts-Joer/2002-2003?



**"Und wieder ist ein Jahr vollbracht, und wieder ist nur
.....gemacht" , ...**

- Déi nei Saison 2002/2003 ass offiziell agelauncht ginn mam **LGS Kongress** den 21te September 2002 an dem **LGS-Cheffdag** den 22te September 2002 zu Déifferdeng.
- Den 27te September huet sech eis Chefféquipe zou engem **St.Martinscheffdag** beim Lis zu Munneref afont. Do goufen d'Veichen gestallt fir d'Saison déi virun eis louch.
- De 5ten Oktober hu mir eis an enger **1ter Versammlung** mat de Kanner a Jugendlechen (Avex a Pio'en) erëmmfont, fir e Réckbléck op déi vergaangen, an en Ausbléck op déi nei Saison ze maachen.
- Vum 11ten op den 12 ten Oktober war de Carlo mat e puer Pionnéier ronderëm de Christophe Machtelincks am Raum Lenningen mat Rucksack a Ravi ënnerwee. Sie hun e flotten **Hierschthike** erliewt, an engem klengen Chalet geschloof , um Lagerfeier gekacht, an nach eng lëschte Kéier an dësem Joer e bëschen Summercamp-ambiance erliewt. Ausserdeem huet de Christophe mat dëser démarche, déi lëscht Konditioun erfëllt fir seng Partizipatioun um **mérite jeunesse Benelux 2002**. Samschdes sinn mir dunn nach zesummen en Unhänger Äppel sammeln gefuer, fir d'Viezkelteren mat de Kanner.
- Den 13ten Oktober hun mir eis mat Fändel um Cortège fir den nationale **Commémoratiounsdag** bedeelegt.
- De 15 ten Oktober hun eis Kanner a Jugendlech beim Carlo doheem eng partie Zänner Äppel zu **Viez** gequetscht. Tradition verlangt datt zum Ofschloss vum kelteren, Thüringer um Feier gergrillt, ginn. Sou hu mir missten am Garage grillen, well d'Wieder nëtt wollt huet wéi mir wollten.
- Den 19ten Oktober 2002 war **Montéesweekend**. Mëttes hunn d'Wëllefcher hir Frënn bis bei déi nei Autobunnsbréck begleet, wou sie , een nom aneren, mat engem Seel hir Montée op d'Bréck bei hir nei Frënn vun den Explorer gemacht hun. Owends an Nuets waren och déi Grouss un der Reih. De Stanislas an de Phillip hun missen bis spéit an der Nuecht an, an ëm Wëntréng allerhand aushalen an ausprobéieren. Eng Fiesta an eng 1t Iwernuechtung am Pioshaus zu Wies huet hire Wee an d'Pionnéier ofgeschloss.
- Den 9ten November hun eis Wëllefcher an enger **Feuerlöschübung** geléiert, wéi sie sëch am Fall vun engem Brand behuele sollen.
- De 16ten November hatten mir eis Elteren a Frënn op en **Elterennomëtteg** invitéiert. Als Ersatzmäertensdag sollt dëst fir eis 2 Pionnéier, d'Vanessa Cum an de Christopher Schuh, eng Gelegenheit sinn, fir hiren Entwécklungshëllef-Projet am Chile an der Krëschtagsvakanz 2002 viirzestellen. Bei Chillie con Carne a Pisco ass déi richteg chilenesch Stëmmung opkomm, an an der Kees fir den Chile huet et gerabbelt.
- den 30ten November 2002 war **Adventskranzbastelen** a **-verkaafen** ugesoot, fir datt all Mënsch deen een wollt, den 1ten Advent seng 1t Kärz ustiechen konnt. Dank der tatkräfterger Viirarbecht vun eiser Amicale hun mir dëss Aufgab locker geléist. En Deel vun eisem Erléis hate mir versprach, an d'Kees vun der asbl " en Härz fir kribbskrank Kanner " ze ginn.
- E Freideg 20ten Dezember 2002 sinn mir op Sandweiler d'**Friddenslicht** vu Betlehem siche gefuer. Déi Sandweiler Scouten waren dat de Weekend virdrun op Wien sichen, an hun et mam Zuch op Lëtzebuerg bruecht.
- Densches drop, op **Helleger Owend** sinn mir an e puer Equippen duerch d'Dierfer vum Fränz Müller senge Pooren gefuer. D'Scouter hun d'Flaam vu Betlehem e puer Krëschtagskichelcher an e Bréif mat Krëschtagswësch vun de Kanner un al an / oder Krank Leit verschenkt, an esou enger ganzer Partie Leit e bësche Luucht a Wärmt an der daisterer Joereszeit geschenkt.
- Vum 13ten Dezember 2002 bis den 3ten Januar 2003 waren dun eis 2 Frënn d'Vanessa Cum an de Christopher Schuh, am Chile, op der anerer Sait vun der Welt derbei, fir mat engem klengen Projet, d'Welt vun defavoriséierten Kanner a Jonken e bëschen besser ze maachen, wéi se virdrun war.

- Vum 2te Januar un haten sech eis Pionnéier RV um Neihaisgen ginn. 1 Nuecht haten sie de Chalet am Bësch vir sech eléng. A wéi sie den nächsten Daag vum Hike erëmkoumen, do haten sech och d'Wëllefcher an d'Explorer do agenistet. Zesummen wollte mir mam ganze Grupp ënnert dem Thema "Dragonballs" de **Wantercamp** (vum 3te bis de 5te Januar 2003) erliewen. Et gouf e wierkleche Wantercamp. Den Dageshike vun den Explorer ass am Schnéi ënnergang, an sie hun erliewt wéi gudd et deet, Frënn ze hunn, déi engem a Schwiereregkeeten hëllef kommen. Am déckste Schlamassel war och de Fonny nees do. Grad aus dem Chile zeréck huet hien schons gehollef déi ageschneiten Explorer vun Houstert ze rapatriéieren.
- Iwregens haten och dest Joer eis Pionnéier, d'Krëppchen an der Duelemer Kiirch mat vill Léift op-an ofgebaut. Eng Arbecht déi am Stëllen geschitt, an awertermingerecht muss gemacht sin.
- Denscheds den 28te Januar 2003 hu mir eis **Generalversammlung** am Home ofgehalen. Eng staark Präsenz vun eise Gemengenautoritéiten huet bewiesen, datt eise Grupp eng fest Plaz am öffentleche Liewen fonnt huet, an datt eis Arbecht op den néidegen Interessie trëfft. Mat enger Chèqueiwerreechung un d'asbl "en Hëtz fir kribbskrank Kanner" hu mir dobei eist Versprechen vun den Adventskranz ageléist.
- An den éischten Wochen vum neie Joer huet een eis Cheffen ëmmer méih dacks gesinn d'Käpp zesummesteechen an ze diskutéieren. Et hung eppes Gréisseres an der Luucht, d'Feier vum 10te Gebuertsdag vun eisem Grupp, déi den 16te Mäz 2003 ugesoot war.
- Nach jhust do virdrun, den 12te Mäz sinn eng Equipe vu Cheffen, Pio'en an Amicale an der Coque beim **Concert vum Garou** géinst den Duuscht am Asatz gewiecht, fir der Pio's-kees e klengen Impuls ze ginn.
- Sondes den 16te Mäz 2003 hu mir mat ganz ville Frënn, bei herrlechem Wieder **Gebuertsdag** gefeiert. Cortège, feierlech Mass, Fändelweih, Eierwein, e gemeinsam Iessen, Réckbléck an Rëmgessinn, jé et war e gelongen Dag, deen eis all mat Stolz an Zefriddenheet erfëllt huet an eis't Zesummengehéieregkeetsgefill nei gestärkt huet. An ganz niefewei hu mir nach eng nei Branche gegrënnt, **d'Raro'en**, fir och eisen "ancien-combattants" no de Pio'en nach eng Plaz ze bidden.
- Samsdeg den 29ten Mäz haten sech eis **nei Raro'en** eng 1t Kéier zu Fëlschdrëff versammelt, fir mam Lis a mam Steve zesummen en Programm fir déi éischt Zeit ze entwerfen.
- Den 3ten Abrëll hu mir Scouten zesummen mat de Fëlschdrëffer Leit de **Kraitzwee** gebied. Eis Wëllefcher hu sech do besonnesch ervirgedon, nëtt zuläsch mat hirem Asatz mat den Täscheluuchten.
- An der Ouschtervakanz sinn eis AVEX-Cheffen an d'"Schoul" gang. De Jang huet hinnen e **Crashcours an Schweessen** gehalen, fir sie sou fit ze maachen fir d'Expeditioun "Seefekështen" déi lo sollt ugoen.
- Den 12ten Abrëll hu mir eis zahlreich un der **Groussbotz** an der Gemeng Duelem bedeelegt. Och beim Thüringer-Iessen duerno hu mir all eis Bescht gemaacht.
- Vu Gréngendondeg (17ten Abrëll) owends bis Karfreideg owends waren mir mat enger halwer Dosend Explorer an der Nuecht ënnerwee, fir de Jesus a senger schwéierster Stonn nëtt eléng ze loossen. D'Operatioun **Getsemani 2003** war eis eng nei Chance, dem Sënn vun dësem Deeg fir eis't Liewen op d'Spuer ze kommen. Eng Veillée an der Nuecht, eng Trapperkichen an hart kiirperlech Arbecht am Dingscht vun eisem Grupp hun eis d'Gefill ginn, eppes Flottes a Sënnvolles erliewt ze hun.
- Den 21ten Abrëll op Ouschterméideg (sou verlangt et d'Traditioun) sinn d'AVEX-Cheffen zesummen mat de Sandweiler Cheffen d'Campplatz an d'Géigend fir de Summercamp inspizéiere gang an hun de Programm fir deen Camp opgestallt an d'Chargen verdeelt.
- Vum 10ten op den 11te Mee haten sech d'Explorer an e puer Pio'en zu Nospelt an enger Schéier aquartéiert. Vun hei wollte mir op neie Wéier an d'Stadt pilgeren, an esou de **Pélé des jeunes 2003** erliewen. Bereichert duerch gemeinsam Gebiedserliewen an eng wonnerbar Natur um fréie Moien, awer och momentweis béis erkaalt an um Enn vill midd, sinn mir um Märtchen awer all nees wakereg gin.
- En Dënschdeg 13te Mee war fir eis Pio'en e speziell Erleefnëss ugesot. An Zesummenarbecht mat der EAR (Equipe animation religieuse) hu sie an der **Krypta** vun der Kathedral eng **reliéis Veillée** zum Thema "so lauschter mol" fir jonk Leit animéiert. Déi Selbstverständlechkeet an deen Asatz mat deem sie hei opgetrueden sinn, huet hinnen de Respekt vun Allen abruecht, déi dëss Veillée erlieft hun. Et braucht een haut schons Courage fir als Jonke Mënsch e sou en daitlechen Témoignage ze maachen!

- den 28te Mee owends war endlech nees eppes gewinntes; d'Playbackshow op der Wiss huet d'**Scoutskirmes** 2003 ugekënnegt. Vill fleissegHänn hun nees mat ugepaakt, d'Wieder war och verstänneg, mais mat der Paischtvakanz waren vill Leit nëtt heiheem, an daat huet een um Terrain gemierkt.
 - Fir NationalFeierdag hu mir eis bal iwerschlo'en. Vum 21ten bis den 23te Juni haten d'Explorer hiren **Technikeweekend** op der Wiss zu Duelem. A villen klengen Atelie'ren sinn Mënsch a Material op de Summercamp viirereed ginn. Nom Te Deum zu Duelem, war d'Bedelegung vun eisen Explorer um Fakelzuch an der Staat eng nei Aktioun déi bei de Kanner gudd ukomm ass. De nämlechte Samsdegs hun eis **RARO'en hiren 1te Weekend** erlieft, fir deen et sie op Colmar-Bierg an den neie Chalet vun der FNEL verschlo'en hat. Nomëttes hu sie nach eis Frëndin a Wëllefchers -cheftaine d'**Monique Weigel** zu Lamadeleine op sengem schwéiere Gang an den "Hafen der Ehe" begleet. War et den ongewinnte Luxus vum FNEL-Chalet, oder hat déi Hochzeitsfeier sie emotional erschüttert? E puer vun de RARO'en hun jiddefalls nuets kee Schloof fonnt, an hu länger Gespréichstherapie'en an gréisser Quantitéiten un flëssegem Berouegungsmëttel gebraucht fir zur Rouh ze kommen. Scout ze sinn oh Jonge Jonge!
 - D'Scoutsjoer ass lues a lues zum Enn komm, awer eis Expeditioun "**Seefekëschten**" nëtt. Déi maache mir dann eben an der neier Saison färdeg a fueren dann am Hierscht eis Course.
 - Den Héischpunkt vum Scoutsjoer stung virun der Diir, de **Summercamp**. Vum 16te bis de 26 Juli waren eis Explorer zesummen mat de Sandweiler AVEX an de Fënsterdall op de **Cast away 2003** verschloen ginn. Wann d'Elteren wéissten: Kléi a Gréngs vun der Wiss hun déi arm Kanner mussen iessen. Duerfir huet hanneno de Kascht bei der Mamm och nees besser geschmaacht. E batteren Beigeschaach hat de Camp awer schon. Wahrscheinlech war et de läschte Camp, wou mir eise Frënd a Paschtouer de Fränz Müller derbei haten. An dem Bewostsinn hun mir him op sengem läschten Dag um Camp, op Scoutsmanéier Äddi a Merci gesot.
 - Vum 16ten bis den 28te Juli 2003 waren eis Pionnéier mat 400 weideren Lëtzebuerger CARAPIO um **nationalen Carapio-camp a Slowenien "Slovenia 2003"**. Dat ganzt war e starkt Erleefness an engem friemen, awer interessante Land, ouni Handy an ouni Euro. An dank dem Steve sengem Organisatiounstalent haten eis Leit ëmmer Gromperen a Forellen genuch (awer keen piwo), a sinn nëtt erhingert.
 - A last but not least, eis Wëllefcher hu sech och nach op de Wee gemaacht. Vum 25ten bis den 27te Juli hun sie sech zou Urspelt bei Klierf Rendez-vous gin fir do, ënnert dem Thema "**Learning by doing**", e puer Deeg Scoutismus à la carte ze erliewen. Während deems huet d'Cheryl um Neihaisgen e Formatiounscamp matgemaacht, fir de 2ten Zyklus vun der **Wëllefcherscheffformatioun** ze absolvéieren.
 - Samsdegs den 9ten August haten déi vun eis, déi nëtt an der Vakanz waren, dat gréngt Hiem nees erausgekroomt, fir bei der grousser **Abschiedsfeier fir de Fränz Müller** derbei ze sinn. Eng Fro huet eis dobei all bewegt: "wéi geet et lo weider um spirituelle Plang?"
 - Wien elo gemengt hat, d'Joer wär eriwer, deen hat sech geschnidden. Ganz erfëllt vum BP sengem mot d'ordre, d'Welt e bës'che besser ze verloossen wéi een se virfonnt huet, sinn nach am August 2003 4 Leit vun eise Grupp an d'**Drëtt Welt** matgefuer, fir do mat de RARO'en vu Lëtzebuerg praktesch **Entwécklungshëllef** (= praktesch Nächstelëift) ze bedreiwen. Esou waren d'Lis Olinger, de Christoph Machtelinckx an de Christopher Schuh am Niger um Wierk, während d'Vanessa Cum a Bolivien sëch fir aner Mënschen nützlich gemaacht huet.
 - An och duerno war nach nëtt Schluss. Vum 30ten August bis den 6ten September waren de Christoph Machtelinckx, de Christopher Schuh, den Tim Seil an de Gilles Vandivinit um STAP um Neihaisgen fir den 2ten Zyklus vun der **Cheffformatioun** ze maachen. Eis 4 Duelemer hun de gréissten Kontingent duergestallt, déi aus engem Grupp derbei waren. Et mëscht Courage an deet gutt ze gesinn, wéivill gudde Wëllen an Déngschtbereetschaft bei eise jonke Cheffen ass. Wann eis aktuell Raro'en, Pionnéier an Explorer d'Viirbild vun eise jonke Cheffen verstinn an unhuelen, an och no an no op dee Wee ginn, braucht et engem em d'Zukunft vum Duelemer Grupp nëtt Angscht ze sinn.
- Niewt dësen Aktivitéiten gehéieren weider opgezielt: Ëm déi 90 Versammlungen mat eise Scouten (all 3 Branchen zesummen), 3 Grupperéit, an eng ganz Rëtsch Präparatiounstreffen vun de Cheffen. D'Vakanz war dach verdéngt oder ?